

忠獻韓魏王家傳

忠獻韓魏公家傳卷第七

賜進上監察御史安陽張士隆重刊

十一月改差公判永興軍兼陝府西路經略安撫使上以手札付公曰今封蔡挺李肅之奏去可見即今彼中處置事宜次第卿若行裝已辦或三兩日引道前去甚好蓋爲此際最要經畫公奏曰薛向始議欲招誘橫山一帶蕃族今種諤已擅據綏州啓此釁端朝廷急遣向往至則主諤謀遂檄諸路舉兵牽制環慶李肅之領兵七千破蕩族帳乃是舉無名之兵反殺戮橫山

老幼豈招誘邪涇原蔡挺又欲合環州兵直趨興靈即是諸路帥臣肆意妄作自棄誓約取怨戎狄以開禍亂之原臣朝夕引道非難遺事倒錯如此須稟朝廷定議願召二府大臣早決成筭翌日公辭二府方奏事未決曾公亮等奏曰今日韓琦朝辭在門外乞與之同議上亟召之公既對即奏曰臣前日備負政府自當參議今日藩臣也惟奉行朝廷命令耳決不敢預聞上觀公意確遂罷議後元豐中呂惠卿除知延州乃自請乞與二府同議邊事坐是貶黜上因諭輔臣曰嘗記韓琦初往陝西召至此與二府議

事再三辭不肯預始知老臣自識體也公未辭之前先請對曰比蒙陛下累次宣諭以延州事宜欲令臣西去忠義感激豈敢拒違聖意然再思之昨王陶斥臣強臣跋扈又謂六卿分晉三家弱魯之事人臣豈可當此今乃以陝西五路兵柄付臣雖自顧無它慮復有效陶語以相傾者臣誅族奚憚恐於國事有害願更熟慮未行聞尚可改議上曰侍中猶未知朕豈有是理邪公既辭上命二府官就公第賜筵屢遣使持酒器勸酌公入境檄諸路非王帥命舉兵者軍法從事先是諸將得隣路帥臣或監司移文即領

兵入西界紛亂無節制自此各知紀律公至則  
詔旨屢趣棄綏州遷降人於內地時會西賊誘  
知保安軍楊定等數人殺之公曰今賊旣若此  
綏州未可棄命薛白賈逵再議之皆謂令折繼  
世統降人共保綏爲便樞密院又降旨曰虜自  
來有邊上庸淺使臣及關中輕躁土人扶挾种  
薛之謀謂因此可遂前非况朝廷豈與犬羊螻  
蟻計較尺寸之地已令廢棄綏州不計楊定之  
事先後速如前詔施行公奏曰西賊誘害朝廷  
恐邊知軍巡檢朝臣不接詔匣其賀登極與賀  
正使人亦更不來過界則是不復顧藉和好朝

而止住歲賜令邊上常作用兵之計既兩  
相賜絕即彼此各擇利而求勝朝廷今已納其  
降人鬼名山以下及諸首領幾萬人令在折繼  
世下禦敵西賊若盡撥在近裏城寨居住不惟  
無地可處兼逐首領亦未必肯與本族下人戶  
分作兩處住坐慮人情不安別生它變况見有  
已修就綏州城池及綏州川內甚有膏腴空閑  
地土若令降人鬼名山與折繼世等因而據之  
其手下人戶皆令在綏州川內相近居處各人  
知具生業以久可自存活自然併力以捍諒祚  
以今機會遂指揮即不得更般糧草赴綏州亦

不得留禁軍廂軍在彼駐劄者非是要久遠費  
國家錢帛糧草爭此無用之地蓋欲以空城付  
之使數萬必死之兵牽制西人常令屯守隄防  
曠日持久自當疲弊不敢併聚凶醜於別路作  
過及令諸路更作困撓之策則冀其早來請命  
今已納其降人得城與地而反自棄之乃是先  
形自弱之勢也且兵主於勢自結隙以來西人  
屢入屢敗其所獲首級不少我之兵勢方振而  
遽自弱之使彼見其形而毒慢不已向去雖欲  
屈就必益驕蹇而難合也况朝廷前降指揮許  
以綏州城與龍名山住坐亦是全朝廷信約若

子撫繼世寇名山使過所望則必各盡死力  
以報朝廷是以夷狄而攻夷狄於國用別無所  
耗萬一二人者他日不能抗而失之亦不繫國  
家邊鄙利害則諒祚所傷所損固亦不勝其計  
矣臣謂薛向賈逵等辟書到上件事理委是於  
國家即今邊計爲便可以施行非是聽用輕躁  
庸近邀功生事之人淺妄之說以救全向諤之  
失也謹遣走馬承受馮德誠乘傳以聞願早賜  
可會夏國主諒祚死乞遣使告哀公又奏曰當  
此變故尤非棄州之時願且留數月以觀虜情  
他日再許納款猶可爲議論之端或今別立疆



畧或換易寨門舊寨或予之拒求降人之請是  
時取捨皆在朝廷樞密院文彥博呂公弼耻於  
中變協謀決議廢棄督促如初公亦條陳不已  
上乃遣入內押班王昭明齎手詔訪公存廢利  
害公奏曰臣當職無狀上煩聖慈委曲開諭夙  
夜不勝愧恐然臣始欲留綏城令繼世與降人  
同處者益以西人與朝廷隔絕之後欲降衆有  
地可居而因以抗賊既西人來告諒祚之哀則  
邊事又有變易朝廷下次必須許今復好故乞  
留此綏城只備數月之糧差人防乎貴與商議  
時易爲束縛存得朝廷久遠事勢今若朝廷以

臣前議爲是即乞責郭逵依此照管如不繫議和利害亦乞直行毀棄詔始如公議不棄初夏國之遣使詣闕告諒祚之哀公又奏曰西夏自誘害揚定以來與朝廷相絕今遽遣使來告即見其國內饑喪乘此危迫故急來赴訴此時若不且以彼國前後違犯誓詔之事先行詰責及令縛送害定等人李崇貴白供奉等歸朝廷行遣以雪數家之冤以正國體俟其一一順服然後開納苟便如元昊身死之初亟行小童冊命之禮且要無事即恐一失機會轉難控制公又以夏國當此變亂之際可以開示大信招納橫

山一帶部族乃爲大字勝於諸路使散入虜中  
詔問公乘此機會有可行事宜密以聞公奏曰  
若告衆人過界沈然不來求議許臣於諸路擇  
要害處興建城寨使彼震懾必速就議先是涇  
原路鎮戎軍新寨裏有地六千餘頃可招弓箭  
手三四十人蔡挺嘗乞於此壕內修築焚會爲  
寨公至此便宜檄挺聚兵城之城成後賜名爲  
熙寧寨公又遣屬官李立之馳奏曰秦鳳路沿  
邊累爲西人侵掠西番熟戶日失藩籬之固昨  
郭達已築治平鷄川二寨包入熟戶疆土不少  
若更修築粟城一兩處則西與古渭寨相接方

成外禦之勢樞密院難曰筆架城是秦州熟戶  
地土將來興置一兩處接連古渭又須添屯軍  
馬計置糧草復如古渭之患況西番熟戶本要  
爲漢藩籬若與築城令熟戶自守必知熟戶不  
能自守須藉漢兵儻有賊至則漢兵當鋒熟戶  
受庇漢有餘力爲之則可但虛內而事外非計  
之得前後臣僚累有奏請以此未曾施行更切  
于細相度以聞公復奏口竊觀漢世圖制匈奴  
患其西兼諸國故表河列郡謂之斷匈奴右臂  
隔絕南羌今西夏所據益多得匈奴之故地自  
昔取一時之議廢棄靈州以來因失斷臂之勢

故德明元昊更無忌憚得以吞噬西番以至甘涼瓜肅諸郡皆爲賊有勢旣大至寶元初始敢僭號以背朝廷是時賊方與諸路邊兵相攻戰故秦渭一帶西番未暇窺奪臣慶曆初曹知秦州今二十六七年矣是時永寧安遠之北綿亘一二百里之外皆是西番熟戶其間有不授捕職名目官中亦不勾點彼族兵馬者則謂之生戶並與熟戶交居共爲籬落故秦州最號藩籬之壯訖元昊納款未嘗侵犯只自慶曆通好後來西人以寇抄爲事見秦渭間西番最爲繁盛又爲我之降人獻說以謂西界諸郡當貴廣有

所出可以光取西番然後以兵扼要害則西川  
諸郡亦皆得之遂一向攻脅秦渭諸番大半為  
其所屬浸淫直逼秦州西路城寨北慶曆中藩  
籬大段薄弱近年西人復將西市城修葺建為  
保泰軍於其中修葺行衙聞甚宏壯命偽駙馬  
花麻總領之只去古渭寨一百二十里即近蔡  
挺與白知軍者公文往來之處去漢界之近如  
此自前未有也又秦州上丁族瞎藥怒質其父  
斯鐸心及逃去與木征相合木征者即唃廝囉  
之孫瞎驪之子也其木征瞎藥更與自來秦州  
多點集不起廣有力量青塘族相結謀立文法

去西界所建西市城甚近陰與夏人通款若漸次盡爲西夏所誘不獨古渭孤危秦州西路城寨日爲賊逼則其董種一帶至回紇以來般次盡爲阻隔秦州券馬自亦稀絕可謂秦塞之深患也與臣二十六年前在秦州時邊事變易全然不同臣不因拜忝西帥亦不能知此子細所以久在西垂諳知邊事者皆謂城築粟則可與鷄川古渭通成外禦之勢隔絕得西人吞併古渭一帶諸番與瞎藥木征青塘等族相結之患少得前世所謂斷臂之策兼自來鄧延瓌慶涇原等路沿邊例皆以城塞包衛熟戶使諸族

知有家計則可以相爲表裏號爲籬落之固不然則諸族老小散居山谷田野間去城寨稍遠西賊一來官軍旣難救應則盡爲賊所殺掠此安可謂之籬落也臣復見涇原路原州有明朱滅滅唐奴三族廣有人力以居處恃險從來點集不起屢殺宜軍出入西界買賣都無忌憚慶曆中每西人入寇則前爲鄉導同爲抄劫後來范仲淹遂於三族之北與西界相接處修置靖安縣寧二寨佛空平耳朶城二堡其明朱等三族於是不敢作過聽從點集始爲籬落之用臣今所以乞城寨粟者非好生事也蓋欲因與西



人議事未復奸間乘此機會可以城之既城此則經久有臣前所陳之利忽而不為則它日有臣前所陳之害故城與不城其利害實繫於國家而不繫於臣在朝廷之深筭也若謂其修城之後又有積兵聚糧之費力未能給臣以為不然蓋鞏栗既城則秦州三陽伏羌永寧來遠寧遠諸寨却在近裏可以均勻抽減逐寨之兵往彼屯泊更有初置酒稅場課利相兼充贖復聞鞏栗城側近有隙地自可挖置弓箭手七八百人就使防守則邊防之勢其雄重可知矣臣今畫廊延慶至原路沿邊城寨對西界小紙圖

于黏連在後陛下觀之則可見今之諸路例皆以城寨包衛熟戶非妄言也欲望陛下更與二府大臣裁酌可否詔從之公又委秦鳳帥馬仲甫與置噴珠堡甘谷通渭熟羊等城寨訖役戎人不敢近寨勸誘古渭一帶蕃部獻地八十餘頃招置弓箭手於是籬落壯固遺聲振矣西夏乃械送宮楊定者李崇貴楊道喜詣闕請命朝廷遣韓頴同公屬官劉航至延安與西人薛宗道議事仍令偕至長安寧公而後往後西人果議願獻納綏州塞門亦乞如舊朝廷遂許之熙寧元年七月公以凡處置多爲執政沮難不得

如志又邊事向寧乃以疾求罷因奏曰陛下辭之  
日親奉德音候西事稍寧即令臣却知相州願  
全舊恩使均勞佚章六上上不許乃召忠彥上  
殿令馳驛往彼慰諭及詢訪邊事忠彥回又附  
表懇訴之乃詔復知相州仍令赴闕朝覲公時  
冒大暑至都上見公形顏顰蹙驚歎久之乃曰  
不知侍中實曾不安始疑託以爲辭自此須且  
速就安養公退而喜曰相州始可必矣陸辭之  
日一從容訪問政事公因條陳用人當辨邪正  
爲治之本莫先於此上又謂卿去誰可屬國者  
公引元老一二人凡所以裨聖德者甚多上曰

侍中國之龜鑑朕敢不從公至相州數月上遣  
御藥院內侍劉有方齎手詔曰地震河朔涉秋  
冬未止川防潰決里民流離朕甚惕然朕嘗虛  
卜宰之位疇卿之還雖歲月一易猶恐未欲輕  
去鄉里且大名爲天下喉襟之地相去止數舍  
間人情未爲不樂也將欲除卿河北四路安撫  
使故馳一介之使以諭朕意苟勉而祇命則朝  
廷豈有北顧之憂哉公奏曰君之使臣當即降  
命而先馳使指委曲爲諭此乃陛下仁卹老臣  
過示優禮然臣方得守鄉郡陛辭之日陛下矜  
臣狀貌知其未安許臣亟赴本任今到任未及

百口恐未能輒當煩重况當此大異之後正在  
朝廷加意拯救凡有措置須假應副若復如陝  
西一皆沮而不行必上誤聖寄二月後降手詔  
曰已除卿判大名府充河北路安撫使仍聽便  
宜從事苟朝廷有可應副朕當力爲主張今差  
御藥院內侍李舜舉齎勅賜卿宜即祇受公再  
辭不許遂之任公以河朔沿邊次邊及近裏以  
來州軍鄉村人戶自去年秋冬以來將帶老小  
車乘衣裝錢物過黃河南去稱昨經災傷往唐  
鄧許汝間請買田土居住至今未絕自來朝廷  
累令州縣存卹賑濟兼去年夏秋殘零稅賦租

謀並已倚閣及住催貸糧不差夫役又見賒糶  
常平倉斛斗支表麥錢非不周至况上件八戶  
各有行裝次第且非寒餓不能自存之人時間  
聽信姦人扇搖輕去父母墳墓與鄉里骨肉離  
散近奉朝旨賑濟許從便宜乃分遣官於諸橋  
渡曉諭計口給券令還鄉里至則又以糧貸之  
兼并之家乘時賤市流民田者皆先令還地寬  
以歲月歸厥直朝廷以大名府路強壯元額一  
萬三千一百餘人今管五千七百餘人今具不  
補因依以聞公奏曰河北強壯自慶曆二年揀  
刺義勇之時下等短弱之人並退充剩負強壯

於帳內別項椿管至今近三十年州縣以退下  
人數更不差填今一路久罹災困非是添補強  
壯之時願罷取索以安衆心從之保州自嘉祐  
以來議欲修展闕城至是劉几復乞展築朝廷  
終以張皇引惹難之公奏曰保州聞欲展城軍  
民莫不欣喜況雄州高陽闕皆嘗修展不聞引  
惹既非割築於慮誓無嫌願亟城之從之

忠獻韓魏王家傳卷第八

賜進士監察御史安陽張士隆重刊

卷八

熙寧三年公乞罷河北四路安撫使奏曰前年以河朔新經大災異民罹饑殍棄業而去者道路不絕臣上體累詔付委之意不敢固辭今已踰朞歲賴聖德所感去年夏秋連得大稔流庸歸復疲瘵一蘇震壞城壘悉已繕固至于定州真定府高陽關三路皆得良帥北慮晏然無事若尚冒此職實爲冗長乙只充大名府安撫使累奏詔從之上留意河北事詔問公曰自北道



休偃兵革垂七十載而人情恬於安佚武備弛於因循養兵雖多而未練畜馬雖衆而未精繕修城壘而未盡堅固簡閱器械而未盡犀利加以隄防決壞溝洫湮廢賦歛不節徭役無時民力困於累年軍儲匱於列郡在興廢而補弊務經遠而適時至於軍政之弛張將吏之能否出入之險易守禦之利害皆可密爲條畫以聞公奏曰此見陛下臨御以來憂邊求治日謹一日居安慮危思患預防之深意也天下幸甚然臣竊謂國家自景德歲與狄人講和邊鄙無事而於禦備之計未嘗不以河朔爲急至於守臣將

吏亦皆盡一時之選其在任者唯以練士卒利器械修城壘治樓櫓爲職業往往出新意自衛能績以求勝取名者多矣積此六十餘年治葺之功可謂堅固軍利數倍景德之前矣去年秋偶以地震水災頗圯處多賴朝廷究心隨以復故唯是霸州信安軍數處以功料稍大經冬息役今則兵力已集土場盡出不三數月間亦見成就臣竊謂平時守備與用兵禦賊急緩之勢固有不同蓋平時守備則當爲之有漸使不勞而易集況兵法曰百樓不攻今河朔諸城待敵之具何止百樓哉而朝旨令十分營葺外更

以二分木植爲之准備是過計也且賊至城下則城內公私所有一木一石皆可爲城守之用較之三分之備不亦多乎夫以平時守備而爲用兵禦賊之計臣恐財用先屈而民力不勝其弊矣臣願朝廷加意選擇一路守臣將官若寢得其人則不在日加約束月降號令自然備豫之事益以脩舉也詔旨謂畜馬雖衆而未精者臣觀近平朝廷講求馬政最爲首務河南河北分置牧使以總治牧事又各有幹當公事官三數員更出巡視編降新制條目甚多臣願朝廷責以歲年則可見其效詔旨謂隄決壞溝洫

漕廢者自去秋黃河決溢恩深等州悉被水患  
朝廷累遣近臣與都水監官負經度已於二股  
河進約分減大河之勢西治生隄以防漫溢臣  
亦嘗以衆議未一輒有論列已蒙朝廷遣司馬  
光等集議條奏事已施行若得向去大河水勢  
均調於今冬來春可再圖其便詔旨謂賦歛  
不節徭役無時民力困於累年軍儲匱於列郡  
此見陛下軫及一道生靈罹此重困思欲慰安  
撫養俾盡適再生之路甚大幸也臣竊見本路  
今夏蠶麥麥登流庸漸復此乃上天垂鑒陛下  
叶昊憂民之心乘此之時臣固願陛下深思

本之重責臣與諸路守帥專務寬卹凡守禦之  
事必令漸爲之備無得煩勞使其瘡痍日安生  
業加厚縱過遠垂有警不得已而取之則民力  
可勝而樂輸於公上矣矧狄人大勢少衰固惜  
盟好制勝之道亦當先料敵情不可亟自紛更  
翻令虜所窺測至若軍政之弛張則朝廷方下  
教閱新法諸路皆謹於奉行將吏之能否則臣  
常加體訪苟有不職即當具迹狀以聞不敢解  
也出入之險易則河朔地皆平坦別無障塞雖  
有唐泊之阻而盛冬冰合或可平度又定保州  
廣信安肅等處皆接西山川口平闊是從

來北虜大兵出入之地不可遮限當用兵之際  
或先據險要或設奇邀擊此皆擊臨時將略不  
可預言守禦之利害則臣前論頗詳不敢煩述  
雖然臣仰膺聖諭丁寧如此謹當力疾自勉夙  
夜究訪管窬或有所得容臣繼以條上不敢遽  
然塞命妄進贅言以誤陛下倚任詢米之意無  
任兢惶待罪之至是秋方行青苗法衆議皆以  
謂不便臺諫官凡言及者皆以罪斥是以中外  
無復敢言者公慨然上疏曰制置三司條例司  
奏今欲將常平廣惠倉見在斛斗遇貴量減市  
價出糶就賤量增市價收糶仍以見錢依陝西

青苗錢例取人戶情願預行支給令隨稅送納斛斗內有願請本色斛斗或納時價貴願納見錢者皆許從便務在優民如遇災傷亦許於次熟日送納若此行之非唯足以待凶荒之患又民既受貸則於田作之時不慮闕食蓋人困乏常在新陳不接之際兼并之家乘其急以邀倍息今通一路之有無貴發賤歛以廣蓄積平物價皆以爲民而公家無以利其入是亦先生散惠興利而抑民豪奪之意也仍乞且於京東淮南河北三路先行此法俟成次第即令諸路依此施行奉勅依奏續准勅節文常平廣惠倉見

錢許依陝西比俵青苗錢例每於夏秋未熟以前約逐處收成時酌中物價立定預支每斗價例出曉示召人情願請領者十元爲一保即不拘戶等高下不願請領者不得抑配若客戶願請即與主戶合保若約度物數支與鄉村人戶有剩即亦許准上法支俵與坊郭有物力抵當人戶如納時斛斗價貴願納見錢者亦聽仍相度量減時價送納夏料於正月三十日以前秋料於五月三十日以前支俵又准轉運常平廣惠倉司牒支俵青苗價錢每十戶以上結成一保須第三等以上有物力人充頭第五等并



客戶每戶不得過一貫五百文第四等每戶不  
得過三貫文第三等每戶不得過六貫文第三  
等每戶不得過十貫文第一等每戶不得過十  
五貫文如所支錢外更有剩數其第三等以上  
人戶委本縣量度物力於今來所定錢數外更  
添數支給若更有剩錢如坊郭人戶實有自己  
物業可充抵當願借請官錢者仍五家以上結  
爲一保依鄉村青苗例支借不得過抵當物業  
所值價錢之半其逐縣不得避免逐時出納錢  
色人扇搖人戶却稱不願請領仰逐縣官  
曉告人戶如不願請領卽具結罪狀

入馬迹申赴當司以憑選差清強官往彼曉諭  
人戶如却願請領其本縣干繫人必定別作行  
遣如事理稍重必具事由申奏應夏秋收成合  
納所請過價錢斛斗如物價稍貴願納見錢者  
當議於市價上減撲錢數仍比附元請價錢十  
分不得過三分假令一戶請過錢一貫文如送  
納見錢即不得過一貫三百文臣竊以國之頒  
號令立法制必信其言而使民受實惠則四方  
觀聽孰不欣服伏詳元降勅語務在優民不使  
兼并之家乘其急以邀倍息皆以爲民而公家  
無以利其入謂合先王散惠興利抑民豪奪之

意也今乃鄉村自第一等而下皆立借錢貫伯其第三等以上人戶更許添數支給坊郭人元有自己物業可充抵當願借請官錢者依青苗例支借不得過抵當物業價直之半鄉村上三等并坊郭有物業人戶乃從來兼并之家也今皆多得借錢每借一貫令納一貫三百文則是官放息錢也與元勅抑兼并濟困乏之意絕相違戾欲民信服不可得也又鄉村每保須要第三等以上有力人充甲頭雖云不得抑勒而上等之戶既有物力必不願請官吏既防保內近下貧戶不能送納豈免差充甲頭以備代陪也

復峻責逐縣如人戶不願請領即令結罪申報  
若選官曉諭之時豈無貧下浮浪願請之人苟  
免撝拾則其勢須行散配且貧下人戶見官中  
散錢誰不願請然本戶夏秋各有稅賦又有預  
買及轉運司和買兩色紬絹積年倚閣借貸錢  
糧麥種錢之類名目甚多今添納此一重出利  
苗錢愚民一時借請則甚易至納時則甚難也  
故自勅下以來一路州縣上下惶惑皆謂若不  
抑散丁戶不願請領只據近下等第與無業空  
戶願請者支俵則實難催納將來必有行刑督  
索及勒干繫書手典押耆戶長同保人等均陪

之患大凡兼并所放自錢雖取利稍厚緣有連  
欠官中不許受理往往舊債未償其半早以續  
得貸錢兼并者既有資本故能使相因歲月漸  
而取之今官貸青苗錢則不然須是夏秋隨稅  
送納如人戶災傷及五分以上方許次科併還  
若連兩科災傷則必官無本錢接續支俵而官  
本因而浸有失陷也其害明白如此更有緣此  
煩費虛擾之事不敢具述兼去歲河朔豐熟常  
平倉所糴白米每斗不過七十五文至八十五  
文省以來自前年分少有似此價賤之時若乘  
時收歛遇向去價貴出糴不唯合於古制而無

夫陷之弊兼民實被惠亦足收其羨贏今諸倉  
亦有糴入而提舉司亟令住止蓋盡要散充青  
苗錢指望三分之利而遂收爲已功縣邑小官  
敢不奉行豈暇更恤貽民久遠之患哉諸路所  
行事體必料大率如此朝廷若謂陝西嘗放青  
苗錢官有所得而民以爲便此乃轉運司因軍  
諸有闕遇自冬涉春雨雪及時麥苗滋盛決見  
成熟行於一時則可也今乃差官置司爲每歲  
春夏常行之法而取利三分又豈陝西權宜之  
比也兼元勅明言且於京東淮南河北三路先  
行此法俟成熟次第即令諸路依此施行今此三

路自觀新制州縣方憂不能奉行而遽於諸路  
遍差提舉官負以至西川廣南亦皆置使伏惟  
陛下自臨御以來夙夜憂勞勵精求治况承祖  
宗百年仁政之後民浸德澤唯知寬卹而未嘗  
過擾若但躬行節儉以先天下常節浮費漸汰  
冗食自然國用不乏何必使興利之臣紛紛四  
出以致遠近之疑哉臣職當安撫日聞一路官  
吏所論皆云散錢不便轉運司明知侵撓利權  
不可經久尚皆不敢陳說而小臣畏罪孰敢言  
者臣若顧避形迹從而默默大懼有悞陛下委  
寄之重欲望聖慈矜臣愚直更賜博訪若臣言

不妄即乞盡罷諸路提舉之官只委逐路提點  
刑獄臣僚依常平舊法施行以安衆心天下幸  
甚時有勅諸軍五服內親卑幼充節級人負若  
被轄人係尊長即轉移於一般軍分公以諸軍  
多是弟姪子孫以父兄尊屬在軍遂願投木營  
同活或無子孫者即召本營人爲舍壻與一身  
有託更有堂從踈屬有服外親充軍後有卑幼  
補爲人負若一旦盡改配別指揮恐軍中人情  
未允只大名一府禁軍合移者已五十餘人在  
京與諸路恐移避者人數不少請轄下有尊長  
唯副指揮以上被轄人與轉移其餘止移別都



五方集卷八  
詔從之至今行之爲法

忠獻韓魏王家傳卷第八

忠獻韓魏王家傳卷第九

賜進士監察御史安陽張士隆重刊

八月公既上章乞罷青苗法條例司復疏難頒下公亦再上疏辨曰臣近以河北跋差官置司春夏放青苗錢與鄉村坊郭人戶明取三分之利每保須要第三等以上有物力人充甲頭督促峻責逐縣支俵有傷國體一路官吏上下皆知不便而以制置條例司是大臣主領但人人腹非而不敢言臣被顧三朝而又職當安撫實不忍雷同默默遂詳陳利害本末乞更加博

訪若臣言不妄即乞盡罷諸跡提舉之官只委  
逐路提點刑獄臣僚依常平舊法施行所冀陛  
下洒然開悟亟賜更改使天下歌舞聖明不為  
盛德之累老臣獻忠之心豈有它也今准都進  
奏院牒却蒙制置司以臣言皆為不當條件疏  
駁乞申勅諸跡及直令進奏官張士程指揮本  
院將曉諭中書劄子頒行天下臣詳制置司疏  
駁事件即將臣元奏要切之語多從刪去唯舉  
其大槩用偏僻曲為沮難及引周禮國服為息  
之說文其謬妄上以欺罔聖德下以愚弄天下  
之人將使無復敢言其非者臣不勝痛憤須至

初有辨列欲望聖慈特紆親覽然後降付中書  
樞密院者詳送御史臺集百官定議如臣所言  
不當耶其從竄竊若是制置司處置乖方天下  
必受其弊耶乞依臣前奏盡罷諸路提舉官只  
委提點州獄臣僚依常平舊法施行以慰衆心  
一臣前奏以元降勅語務在優民不使兼并之  
家乘其急以邀倍息而公家無以利其入今乃  
鄉村自第一等而下皆立借錢貫百其第三等  
以上人戶更添數支給坊郭人戶有自己物業  
可充抵當願借請官錢者依青苗例支借不得  
過抵當物業價直之半且鄉村上三等并坊郭

有物業人戶乃從來兼并之家也今皆多得借錢每得一貫令納一貫三百文則是官放息錢也與元勅抑兼并濟困乏之意絕相違戾今制置條例司疏駁云言者以謂元降勅命云公家無所利其入今河北提舉官乃令取息三分是與元勅絕相違戾失信於百姓本司今按周禮泉府之官民之貸者取民息有至二十而曰國事之財用取具焉今常平新法預俵青苗價錢但約熟時酌中物價若熟時物貴即許量減市價納錢即是未定合納實數故河北提舉官則約束州縣若情願納錢不得過三分至於京西

等以提舉官則大抵約束不得過二分

此蓋為量減時價指揮未有約定實數以通

融時斛斗價例倍貴州縣量減錢數不多却致

虧損百姓所以有此約束即非法外擅為侵刻

也就諸路提舉官所納唯河北所約分數最多

然云不過三分之息定取三分之息若物價低

平即有合納本色不收其息或只收一二分息

之時多少相補比周禮貸民取息立定分數已

不為多近降指揮又令諸路預俵價錢若遇物

價極貴亦不得過二分即比周禮所取尤少者

臣竊以既立太平之法必無剝民取利之理但

漢儒以去聖之遠解釋或有異同耳按周禮泉  
府掌以市之征布歛市之不售貸之滯於民用  
者以其價買之物揭而書之以待不時而買者  
各從其抵鄭衆釋云書其價揭著其物也不時  
買者謂急求者也抵故價也臣謂周制民有貨  
在市而無人買或有積滯而妨民用者則官以  
時價買之書其物價以示民若有急求者則以  
官元買價與之此所謂王道也經又云凡賒者  
祭祀無過旬日喪紀無過三月鄭衆釋云賒賁  
也以祭祀喪紀故從官賁買物庶費公彥疏云  
賒與民不取利也經又云凡民之貸與其有司

辨之以國服為之息鄭衆釋云貸者謂從官借  
木費也故有息使民弗利以其所賈之國所出  
為息也此所謂王道也而鄭康成釋云以其於  
國服事之稅為息也於國事受園廩之田而貸  
萬泉者則其出息五百臣謂周禮園廩二十而  
稅一近郊十一遠郊二十而三甸稍縣都皆無  
過十二唯其漆林之征二十而五漆林自然所  
主非人力所作故稅重康成乃約此法謂從官  
貸錢若受園廩之地貸萬錢者出息五百公彥  
因而䟽解謂近郊十一者萬錢其出息一千遠  
郊二十而三者萬錢其出息一千五百甸稍縣



都之民萬錢暮出息二十臣謂如此則須漆林  
之戶取貸方出息二千五百也然當時未必如  
此今放青苗錢凡春貸十千半年之內使令納  
利二千秋再放十千至年終又令納利二千則  
是貸萬錢者不問遠近之地歲令出息四千也  
周禮至遠之地止出息二十今青苗取利尚過  
周禮一部則制置司所言比周禮貸民取息立  
定分數已不為多亦是欺罔聖聽自謂天下之  
人皆不能辨也且今古異制貴於便時周禮所  
載有不可施於今者其事非一若謂泉府一職  
今可施行則一言以官錢實在市不售及民間

取利已厚傷農已深奈何更引周禮國服為息  
之說謂放青苗錢取利乃周公太平已試之法  
此則誣汙聖典蔽惑睿明老臣得不太息而慟  
哭也又制置司所云提舉官約束州縣納錢不  
得過三分二分蓋為量減時價指揮未有約定  
實數恐遇納時斛斛價例倍貴州縣量減錢數  
不多却致虧損百姓若物價低平即合納本色  
不收其息臣亦謂此論之不實也緣小麥最為  
不耐停蓄之物自来常平倉不糴蓋恐積留損  
壞今歲諸路雨雪及時二麥有望麥價必賤提  
舉官必不肯令人戶送納本色蓋納下本色則

無由變轉若於轉運司兌換錢則諸處軍糧  
支麥絕少必難兌換既難兌換則占壓奉錢下  
次却無錢散與人戶臣以此知制置司與提舉  
官本無令人戶送納斛斛之意故開此許納見  
錢一門將來只令言人戶情願送納奉色則人  
戶須至糶麥納錢豈不殃害百姓唯陛下早悟  
臣言一制置司云言者以謂三等戶及城郭有  
物力戶即從來兼并之家今乃立定貫百許之  
貸借即非抵兼并之意又河北提舉官每催須  
要上三等戶名即上等入戶必不願請管束此  
防貧戶不能送納豈免差充甲頭以備代陪又

河北提舉官乃峻責州縣如人不願請領賑  
罪申報若選官晚諭人戶却情願請領即當別  
作行遣若選官晚諭苟免拮据豈無貧下浮浪  
願請之人或須行散配本司今按鄉村上三等  
及城郭有物業戶內亦有闕乏之人就人取債  
豈皆是兼并之家今貸貧民有餘則以俵此等  
人戶免令就私家取一倍之息乃是元勅抑  
兼并之意河北提舉官每保須要上三等戶一  
名者蓋為關防浮浪之人請去將來難為催納  
若有上等戶肯與同保即非浮浪之人自不須  
憂難為催納若無上三等戶肯與同保即自依

佳提舉官公文不許支俵何須更行散配若謂  
上三等必不肯請領須是差作甲頭郎自是抑  
勒有違前法況今年開封諸縣已經俵散甚有  
上三等戶情願請領郎非官吏抑勒以近驗速  
事理可知至於提舉司約束官吏如無人情願  
請領郎結罪申報別選官曉諭乃只是關防因  
循避事壞法之人郎非迫脅官吏須令押配百  
姓若提舉官急於功利諷令州縣押配與人郎  
諸路各有安撫轉運提刑其為朝廷委任皆在  
提舉之上若有州縣官員故欲隳壞新法曲徇  
提舉官抑勒百姓自當糾舉依法施行并具事

伏聞奏豈宜以官吏違法之故遂欲廢法臣竊  
以鄉村上三等及城廓有物業人戶非臣獨知  
是從來兼并之家以天下之人共知也今制置  
司以爲不是兼并之家者只要多散青苗錢與  
之而得利亦多也其如元降勅意本務拯濟困  
乏却將錢放與此等八戶則天下明知朝廷  
以取利爲意實傷國體制置司若謂周官有貸  
民之法取之以道於理無嫌則今兼并之家例  
開質庫置課場若恐取民倍息以傷貧細則所  
在皆可官自開置以抑兼并然自前世以來惡  
其太近哀矜不忍爲之今青苗錢一事無近於

此乎又云每保湏要上二等戶一名者益關防  
浮浪之人請去難為催納此則抑勒之勢不假  
臣言而自明矣又云若謂上三等戶必不肯  
請領湏至差作中頭即自是抑勒有違前法此  
又殊不知事勢人情有不得已而爲之者且青  
苗之法內有大臣力主事在必行外有專差之  
官唯以散多爲職辨州縣官吏往往變抑勒而  
爲情願者益事勢不得不懼而人情不得不從  
也監司之官其於事勢人情亦何異此九重高  
遠豈得盡知唯陛下早賜辨察一制置司云言  
者以謂躬行節儉常節浮費自然國用不乏何

必使與利之臣四出以致使遠近之疑本司今  
按先王之政未嘗不以食貨爲始張官置吏六  
抵多爲農事也近世以來農人尤爲困苦若朝  
廷但有徭役加之初無歲時補助之法近自京  
畿陂防溝洫多有不治乃至都城側近縣地數  
百里棄爲污萊父子夫婦流離失業四方遐僻  
不可周知一方水旱則餓死者相枕藉而流移  
者填道路如前歲河北一饑不免漕江淮之米  
以救之然於人之流亡餓殍未有補也至於非  
汎用度或不免就等第人戶彊借錢物百姓典  
賣田產物業以供暴令此亦可謂國用之美至



於差役困苦農民使之失職則士大夫之所共見不待論說而後可知故陛下即位詔書丁寧以務農理財免人役爲政事之急誠方今宜憂爲在此也今置提舉常平廣惠倉官兼管幹農田水利差役事者凡以爲此而已固非使之脧削百姓以佐人主私費亦豈得謂之興利之臣而以爲致遠近之疑臣詳制置司所言提舉常平倉官實不是興利之臣今既明舉貸錢取利之法謂取之以道於理無嫌則非興利而何至於東南所差均輸之官亦皆興利之臣也且西川四路鄉村民多大姓每一姓所有客戶動是

三五百家賴衣食貸借仰以為生今若差以置  
司更以青苗錢與之則客於主戶處從來借貸  
既不可免又須出此一重官中利息其它大姓  
則固不願請領苗錢又廣南東西路土曠人稀  
水鄉之俗粗足生計今亦置官司貸錢取利故  
於遠民尤為不便豈得不謂之以致遠近之疑  
也國家幅員至廣一方之有水旱時所不免然  
朝廷未嘗不假貸糧種盡救荒之政以濟卹之  
故得饑饉者復蘇流庸者復安自祖宗以來可  
謂仁政充洽矣而未嘗曾就等第人戶處彊借  
錢物唯是英宗皇帝及陛下即位之初天下名

有優賞朝廷自京師應副未及間有三兩路州軍曾於坊郭富民處權暫支借者然亦即時輦還今制置司指爲暴令以頒布天下是唯知主張青苗之法而不顧毀謗之甚誠可駭也唯陛下早賜省察一制置司云言者以謂坊郭人戶既無青苗不可貸借本司今按常平舊法亦糴與坊郭之人今若俵散農民有餘仍不許坊郭之人貸借是令常平有滯積餘歲而坊郭之人獨不被賑救乏絕之恩也周禮設貸民之法即無都邑鄙野之限今新法乃約周禮太平已試之法即非專用陝西青苗條貫也臣詳制置司

此說尤爲不實蓋自來常平倉遇歲歉來糴物  
價稍高合減元價出糴之時其鄉村則逐處分  
下諸縣取逐鄉近下等第戶姓名印給關子令  
收執赴倉每戶糴與三石或兩石以來所是坊  
郭則每日零細糴與浮估八戶每口五勝或一  
斗以米故民受實惠甚濟飢之即米見曾坊郭  
有物業八戶乃來零糴常平倉斛斗者此蓋制  
置司以青苗爲名欲剩借錢與坊郭有物業之  
人以望得利之多假稱周禮太平已試之法以  
謂無都邑鄙野之限以文其曲說惟陛下深詳  
其妄一臣近准真定府路安撫使司公文稱准

河北都轉運常平廣惠倉司牒真定府准制置  
條例司劄子據河北都轉運常平廣惠倉司狀  
准朝旨於內藏庫支到山東絹二十萬匹充常  
平本錢尋分擘與諸州縣出賣必是破貨不了  
欲將絹分作兩等上等每匹作一貫三百五十  
文省次等每匹作一貫三百文省召人戶情願  
依青苗見錢法請領仰更切相度如依減定價  
例委是人戶情願即依所申施行如坊郭人戶  
情願請領者亦聽常平司差帖毀侍康承丙稱  
自京般來絹二十萬匹唯有真定府未曾差人  
赴恩州請般貼康承丙疾速往真定府管下縣

分通行催促火急和雇。乘赴恩州請敕趁時支俵勘會真定府於恩州支下絹三萬匹雖未般到緣係準備充秋料青苗價贓不關錢支用若更差使臣下州府縣分催促支散及取索文字深屬張皇搔擾牒臣本司請照會者臣遂備錄聞奏庶朝廷見其為害之深乞察臣前奏散青苗錢不便事理早賜施行却准中書劄子奉聖旨康承丙元係皮公弼等乞差克差使幹當無累降指揮令提刑司常切覺察所散青苗錢召人戶情願不得抑勒或有抑配俵散便令止絕當職官員具姓名聞奏劄與臣知者臣勘會

轉運司昨將山東絹配賣與諸州軍坊郭等第  
人戶每一匹估錢一貫五百三十文至一貫六  
百文以來限半年納錢尚猶近下等第人戶有  
破賣家財方能貼陪送納了當者今常平提舉  
官將山東絹二十萬匹上等者作一貫三百五  
十文每一貫取利二分每匹已是一貫六百五  
十文省下等者每匹作一貫三百文并利亦是  
一貫六百文省並隨稅只是百餘日省限納足  
與轉運司配賣與坊郭人戶價例全不相遠即  
於農民豈不為害更差使臣督迫支俵公文內  
動是火急之言則州縣小官唯是應命苟免過

各制司事官情願何處更可辨明且制置三  
司條例司雖大臣主領然終是定奪之所今將  
緡二十萬緡直行指揮許散與鄉村人戶依青  
苗法納錢及令坊郭人戶願請者亦聽則自來  
未見有定奪之司事不關中書樞密院不奉聖  
旨直可施行者如此則是中書外又有一中書  
也然中書凡事亦須進呈或候畫可方敢施行  
未嘗直便處分唯陛下察其專也如此則在外  
守職臣僚其誰敢不稟從望早賜辨察使事歸  
府庶於國體為便上始得公䟽意已大悟亟  
命寢罷時王安石聞公有言已引疾在告唯參



知政事趙抃等對上諭欲罷之意抃乃曰此主  
於安石乞更俟安石出議之安石既出執之益  
堅聞者惜之未幾呂公著為御史中丞亦言青  
苗法非便安石欲黜之上曰須別坐事令出既  
而又曰公著言韓琦近有章疏朝廷亦當聽納  
自古執政與藩臣若生間隙至有舉晉陽之甲  
以逐君側之惡者安石遽曰只此可以逐矣公  
著遂坐誣大臣欲舉晉陽之甲罷知蔡州諫官  
孫覺聞之曰此言覺嘗奏之今貶公著誤也公  
既以言忤權臣又公著告詞明坐所因公益憂  
恐遂以疾上章乞知徐州章四上神宗遣內侍

李姓舉慰諭乃止

卷八

李姓舉慰諭乃止

卷八

忠

欽定魏王家傳卷第九

忠獻韓魏王家傳卷第十

賜進士監察御史安陽張士隆重刊

熙寧四年公至大名二年矣又上章乞邢相一  
郡二月改永興軍節度使再任制曰分陝稱伯  
召南當公職之尊啓魏就封畢萬得國名之大  
况吾元老為世宗工父倚帥垣之嚴宜遷尹節  
之寵飭宣典策敕告縉綬具官琦道醇而深器  
遠而博渾渾忠孝之業憲憲文武之資感通仁  
朝亮衆未於台極翼戴英考捧大明於天衢肆  
朕績圖取初謀落燹諧四氣之序熙輯百家之

成登昭公槐奄泣國社鎮定大事安如九鼎之  
安承寧諸侯端若元龜之信歲勤再閱師律既  
和重念郊圻之雄旁據河山之險徒得君重以  
宣王靈就更西雍之旄留主北門之鑰載航宗  
爰賦并實幹封於戲漢咨陳平安危注於上意  
唐因裴度輕重繫乎殿身維廼純誠無媿前列  
懋服休命往其欽哉可特授依前守司徒檢校  
太師兼侍中行京兆尹魏國公充永興軍節度  
管内觀察處置等使再任判大名府兼北京留  
守司事畿內河堤勸農監牧使充大名府路安  
撫使兼大名府路駐泊馬步軍都總管加食邑

一千戶食實封三百戶功臣散官勲如故公力  
辭不拜後及三年復乞納節如前請並七上不  
許滿四年再請六年二月移判相州契丹遣使  
辦理河東地界上賜手詔詢訪公奏曰臣伏蒙  
聖慈特差入內內侍省內東頭供奉官幹當內  
東門司裴昱齋賜臣手詔以朝廷通好北虜幾  
八十年近歲以來生事彌甚代北之地素有定  
判而輒開釁端妄來訴理比敕官吏同加按行  
雖圖籍甚明而詭辭不服今橫使復至意在必  
得朕以祖宗盟好之重固將憂容虜情無厭勢  
恐未已萬一不測何以待之古之大政必詢故

老卿夙懷忠義歷相三朝雖爾身在外乃心罔  
不在王室其所以待遇之要禦備之方密具以  
聞朕將親覽臣晚年多病心力耗殫日欲再乞  
殘骸保此類幕才意陛下以北虜生事深恐預  
防記及孤愚曲有訪逮敢不勉竭衰殘少塞聖  
問臣竊以契丹稱疆北方與中國抗者蓋一百  
七十餘年矣自石晉割地并有漢疆外兼諸戎  
益自驕大在祖宗朝屢嘗南牧極肆凶暴當是  
時豈不欲悉天下之力必與虜角哉終以愛惜  
生靈屈就和好凡疆場有所興作深以張皇引  
志為誠以是七十年間二邊之民各安生業至

於老死不知兵革戰鬪之事王仁大惠不可加也臣觀近年以來朝廷舉事則似不以大敵為卹虜人素以久疆之勢於我未嘗少下一旦見形生疑必謂我有圖復填南之意雖聞虜王辱而佞佛豈無疆梁宗屬與夫謀臣策士引先發制人之說逞此學端故屢遣橫使以爭理地界為名觀我應之之實如何耳所以致虜之疑者臣試陳其大略高麗臣屬契丹於朝廷久絕朝貢向自浙路遣人招諭而來且高麗小邦豈能當契丹之盛來與不來於國家無所損益而契丹知之謂朝廷將以圖我此契丹之疑也秦州



古渭之西吐蕃部族散居山野不相君長耕牧  
自足未嘗為邊鄙之患向聞疆取其地建熙河  
一路殺其老小以數萬計所費不貲而河州或  
云地屬董氐董氐即契丹壻也既恐闕地未已  
豈不往訴而契丹聞之當謂行將及我此又契  
丹之疑也北邊地近西山勢漸高邠不可為塘  
泊之處向聞差官領兵徧植榆柳冀其成長以  
制虜騎然興於界首無不知者昔慶曆慢書所  
謂擬立隄防部塞要略無以異矣然此豈足恃  
以為固哉且使契丹之疑也河朔義勇民兵置  
之歲久耳目已熟將校甚整教習亦精而忽然

國保甲一道紛然義勇舊八十去其七或撥或  
保甲或放而歸農得增數之虛名破可用之成  
法此又徒使契丹之疑也自虜人辦理地界河  
朔沿邊與近裏州郡一例差官檢討修築城壁  
開濶壕塹趙冀北京展貼之功役者尤衆敵樓  
戰棚之類悉加換葺增置防城之具率令備足  
逐處衣甲器械累次差官檢視排垛張盤前後  
非一又諸處棚都作院頒降新樣廣謀造作澶  
州等處棚為戰車此皆衆目所覩謀者易窺且  
虜人未有動作彼無秋毫之損而我已費財  
殫力先自困弊又徒使契丹之疑也近復置立

河北三十七將各專軍政州縣不得關預雄州地控極邊亦設將屯兵其隨軍衣物有令兵士已辦者有令本營增置者有令官造給付者以至預籍上戶車馬驢騾準備隨行明作出征次第不可蓋掩此又深使契丹之疑也天北虜素為敵國施設如此則積疑起事不得不然亦其善自為謀者也今橫使再至初示假蹇以探願朝廷況代北與雄州素有定界若優容而與之實慮虜情無厭浸深不已誠如聖詔所諭固不可與或因其不許虜遂持此以為已直縱未大舉勢必漸優諸邊卒聽盟好益事有因緣而至

此者乃煩明詔訪以往還備禦之要自顧老朽  
夙夜思之其將何策上助聖筭然臣聞言未及  
而言謂之躁言及而不言謂之隱臣昔曾言散  
青笛錢不便事而言者輒肆厚誣非陛下之明  
幾及大戮自此新法之下雖其間有未協人情  
者實避嫌疑不敢更有論列今親被詔問事繫  
國家安危言及而隱是大不忠罪不容誅矣臣  
豈竊計始為陛下謀者必曰自祖宗以來紀綱  
法度率多因循苟簡非變不可也治國之本當  
先富彊之術聚財積穀寓兵於民則可以鞭笞  
四夷盡復唐之故彊然後制作禮樂以文太平

故始散青苗錢使民出利所得之利復以為本  
必務多取歲增本錢無有定數又為免役之法  
自上等以至下戶皆今次第出錢募人應役從  
來上戶輪當衙前重難故其間時有破敗者今  
上戶一歲出錢不過三十餘緡安然無事而令  
下戶素無役者歲歲出錢此則損下戶而益上  
戶雖百端補救終非善法又役錢之內每歲更  
納寬剩錢以備它用此所謂富國之術者也且  
農民送納夏秋稅賦一年兩次納不前者始有  
科校之刑今納青苗與役錢已是加賦有過限  
者亦依二稅法科校則是一戶一歲之中常負

積滯之貨候民急求則依元買價與之民有祭  
祀喪紀就官中借物限旬日三月還官而不取  
其利制置司何不將此周公太平已試之法盡  
申明而行之豈可獨舉注疏貸錢取息之利事  
以詆天下之公言哉鄭康成又注云王莽時貸  
以治產業者但計贏所得受息無過歲什一公  
彥疏解云王莽時雖計本多少為定及其催科  
唯所贏多少假令萬泉歲贏萬泉惟一千贏五  
千催五百餘皆據利催什一臣謂王莽時官貸  
本萬錢歲終贏得萬錢只令納一千若所贏錢  
更少則納息更薄比今於青苗錢取利尤為寬

少而王莽之後上自兩漢下及有唐更不聞有  
貸錢取利之法今制置司遵堯舜之主不以二  
帝三王之道上裨聖政而貸錢取利更過王莽  
之時此天下不得不指以為非而老臣不可以  
不辯也况今天下田稅已重固非周禮什一之  
法則又隨畝更有農具牛皮鹽錢麴錢鞋錢之  
類凡十餘名件謂之雜錢每遇夏秋起納官中  
更將紬絹斛斗低估價例令民將此雜錢折納  
又每歲將官鹽散與人戶謂之蠶鹽令民折納  
絹帛更有預買轉運司和買兩色紬絹知此之  
類不可悉舉皆周禮田稅什一之外加歛之物

六次科技民不勝矣稍遇水旱則逋負官錢流  
移失業事已著見孰敢言者又內外置市易務  
盡籠天下商旅之貨官自取利主者以得利為  
功雖刀必取小商細民遂無所措知以新制日  
下更改無常州縣官吏茫然不能詳記稍有違  
者皆坐徒刑雖經赦降去官不得原免監司督  
責以刻為明簿法之苛過於告緡故州縣之間  
官吏惴惴然日苟一日皆以脫罪為幸夫農者  
國之根本也商者能為國致財者也官吏助朝  
廷之教化者也今農者則怨於畎畝商者則難  
於道路官吏則所在不安其職而恐陛下不能



盡知也夫欲攘斥四夷以興太平而先使邦本  
困搖衆心離怨振古以來未聞能就此則為陛  
下始謀者之大誤也陛下有堯之仁舜之聰知  
其所誤能改不吝聖人之大德也又今好進之  
人不顧國家利害但謂邊事將作富貴可圖獻  
策以干陛下者必曰虜勢已衰特外示驕慢耳  
以陛下神聖文武若擇將臣領大兵深入虜境  
則幽薊之地一舉可復此又未之思也今河朔  
累歲災傷民力大乏沿邊次邊州郡芻糧不充  
新選將官皆羸勇寡謀之人義勇保甲新點未  
經訓練若驅重兵頓于堅城之下糧道不給虜

人四向來援腹背受敵欲退不可其將奈何此  
太宗朝雖曹彬未信名德宿將猶以致岐溝之  
敗也臣愚今為陛下計謂宜遣使報聘優致禮  
幣開示大信達以至誠具言朝廷向來興作乃  
修備之常與北朝通好之久自古所無豈有它  
意思為謀者之誤耳且疆土素定當如舊界請  
命邊使退近者侵占之地不可持此造端欲聽  
祖宗累世之好永就信誓兩絕嫌疑望陛下  
將契丹前所疑之事如將官之類因而罷去以  
釋虜疑萬一聽服則可以遷延歲月陛下益養  
民愛力選賢任能疎遠姦諛進用忠鯁使天下

悅服還備日嚴塞下有餘粟帑中有羨財俟虜  
果有衰亂之形然後一振威武恢復舊疆快忠  
義不平之心雪祖宗累朝之憤陛下功德赫然  
如日照耀無窮矣如其不服決欲背約則今河  
北諸州皆深溝高壘足以自守虜人果來入寇  
所在之兵可以伺便驅逐大帥持重以全取勝  
然自此彼來我往一勝一負兵家之常不可前  
料即未知何時復遂休息也至於清野之法則  
難盡行蓋事宜之際不可率一境之民比戶將  
牛馬餼糧盡入城郭蓋至時或有往保山寨者  
或有挈家渡河者或有留人看守莊舍者或有

近入居城郭者當使人得自便方保安全固  
不可按圖先定必令盡入城郭而居也雖有嚴  
令必不從也惟祖宗朝屢經北虜之侵鄉民避  
寇卒亦如此願朝廷不須一一處置臣歷事三  
朝十年輔相官已極品歸榮於郡萬事無不足  
者年將七十宿疹在身每思告老而去庶全始  
終此緣聖問之及因敢一貢盡言非嫉善也非  
求遷也用是足以自信今天下之人漸不敢以  
直言為獻臣竇亦不忍負累朝眷遇之恩猶覲愚  
瞽一悟聖心為宗社之盛福惟陛下加察賜以  
不疑非獨老臣幸甚天下幸甚時文路公富鄭

公嘗同被詔問公所對最為切直七年秋公累上  
章乞致仕章每上上必遺近侍齎詔慰諭不允  
明年夏公又力謝事後改永興軍節度使京兆  
尹再任公方力辭而疾革矣八年六月二十四  
日薨於相州之正寢前一夕有大星殞于畫錦  
堂側享年六十八訃至京上震悼甚輟視朝三  
日遣中使慰撫本家凡典禮悉令按趙普故事  
施行贈尚書令告第曰朕勿休聖緒綏撫四方  
實賴全德老臣蕃屏土室今其亡也何痛如之  
故推忠宣德崇仁保順守正協恭贊治純誠亮  
節佐運翊戴功臣永興軍節度管内觀察處置

等使關府儀同三司守司徒檢校大師兼侍中  
行京兆尹上柱國魏國公食邑一萬六千八百  
戶食實封六千五百戶韓琦靖備以有謀莊重  
而不撓早有天下之望有結人主之知出入三  
朝周旋二府仁皇與子既推定策之功先帝建  
儲復預受遺之託汔繇輔翼以底丕平澤被生  
民勲在社稷嚮刀懇辭重任出撫近藩屢厭節  
旄之榮願還卹綬之奇方深注倚遽此殲亡夫  
三省之官惟尚書令為尤重非功德卓越不以  
假人眷言老成宜峻徽典尚其精爽膺此寵榮  
可特贈尚書令宣制文德殿以公配享英宗廟

廷制曰功茂者賞惟其稱德厚者報不可忘故  
命冊褒崇舊史有追封之典祀祧躋配前書存  
與享之文蓋君臣之義不獨欲榮寵之於其生  
抑邦家之光實亦冀顯揚之於不朽惟時故老  
翼我前朝式敷懿於治庭肆儀圖於典禮故承  
興軍節度使守司徒檢校太師兼侍中魏國公  
贈尚書令韓琦才資沈偉宇量恢宏勇義出於  
至誠朴忠可以大受盡瘁於國利無知而不為  
任重於時事雖難而必濟惠澤有加於四海謀  
猷實紀於三朝緬懷弼亮之勤重起淪亡之痛  
是用進登烈考之清祐禋享功臣於大丞上以

慰祖宗之靈下以為忠義之勸於戲為臣至此  
可無愧於前良與國同休庶永傳於茂烈茲惟  
盛美以荅元勲可配饗英宗皇帝廟庭主者施  
行上以尚書令不兼官是為真令特以贈公又  
配享特鑲院告廷皆異典也上又遣禮官大常  
丞集賢校理李清臣致祭於樞前又遣內侍詢  
本系所欲凡例外令一切條上復命姪正彥自  
兩浙提舉官知相州令過闕賜對面諭令昭管  
諸孤差入內都知利州觀察使張茂則監護葬  
事入內供奉官張懷德增修墳兆以石為幽堂  
所費皆給于官臣僚之葬於法不許以石為室



今特詔用之自公始也再遣幹當御藥院李舜  
舉實於靈几及許紆子嘉彥將來尚主仍諭忠  
彥曰先侍中忠義於國平生奏議甚多可悉錄  
奏來勅崇文院遣筆吏數人至相州遂以二府  
忠義五卷諫垣存藁三卷陝西奏議五十卷河  
北奏議三十卷雜奏議三十卷上之上得之喜  
閱之殆遍後嘗因二府奏事上問或曰韓琦嘗  
有此議蓋見奏議所載也又有安陽集類五十  
卷祭儀一卷藏于家有司考行應憂國忘家文  
賢有成之法謚曰忠獻詔本家令以行狀來上  
神宗乃親製神道碑以賜之題碑額曰兩朝顧

命定策元勲之碑葬於相州安陽縣豐安村祖塋之西北原公昆仲六人長元次兄與第四兄皆蚤亡先太師捐館時公方數歲惟第三兄諱琚最長始爲州縣官後終於司封員外郎公同母兄諱璩終著作佐郎公與著作皆育於司封兄後公與著作同年登進士第公方為禁從漸貴顯而二兄相繼皆亡收恤諸孤皆同己子公氣貌嚴重人雖望而畏之及夫接物極恭而溫初為館職所與游者皆一時英俊石曼卿氣豪邁多戲侮同舍獨見公不敢少慢但時呼為韓家蓋當時市井小民凡所畏者尊官則呼厥姓

曰某家故石劾此語為人敬服如此器重閎博  
小大無所不容公自在館閣及登侍從郎有重  
望於天下與同館王拱辰御史蕭定基同發解  
開封府舉人拱辰定基時有喧爭公安坐幕中  
閱議卷如不聞拱辰忿不助已詣公室謂公曰  
此中習宰相器度邪公和顏謝之及公為樞密  
副使石介有廢曆聖德頌曰予早識琦琦有奇  
骨可當大事就辭厚如勃後為宰相歐陽永叔  
作相州畫錦堂記曰臨大節決大事無紳正笏  
不動聲色氣而指天下於太山之安可謂社稷  
之臣矣天下傳之以為知言堂乃公為鄉郡時

所建也慶曆中公與杜衍富弼范仲淹同心輔政更革弊事援引正人時張方平錢明逸王拱辰為兩制皆歷中丞故杜祁公而下為三人者排逐皆為明黨相繼罷去是時二府許遂廳見賓客拱辰未見曰諷勸公奮手作跳擲勢口頭足躍出堂中公對曰琦惟義之從不知有黨也既而公亦求去位公之在相位也凡進人才惟以公議所在多有未嘗識者人亦不知出何人門下人或可詢聞所稱薦用之不疑嘗訪於王安石曰文行則孫覺吏事則張頴皆可用也時二人皆常調小官公乃處覺於館閣任頴於省

府如此之類也公薦引於上前者固多亦未嘗  
自漏上前之語間曰上有宣諭或同僚談說人  
始聞也公初罷相上問孰可以為執政者時公  
力薦韓絳忠直有公輔之器上遂用為樞密副  
使既而有排毀絳者上曰韓琦引去推薦此人  
朕豈可違公既罷去蘇頌除修起居注往謝二  
府執政趙鼎曰韓公屢欲用君以曾公避親嫌  
今乃二記前日韓公語矣二公始知公 嘗援  
已也公待人一以至誠亦未嘗懷怨於人人或  
有不善於公公待之終不疑也慶曆中孫沔為  
御史以西事詆公甚力後公為宰相沔以罪廢

陝西用兵起河帥慶州過關賜對英宗諭曰  
韓琦稱卿有邊帥才故復用卿河退而袖長書  
俯伏謝罪皇愧幾無所容天章閣待制李師中  
父緯昔為陝西裨將公方領經略之任時緯與  
賊戰而兵敗密詔公斬於退兵之地公特中理  
緯得不死而猶重貶人莫之知也師中乃謂父  
貶因公所奏遂請闕訟公言西兵之敗當先誅  
元帥後緯知公嘗有言故已也每見公未嘗不  
泣下叙感然師中終以前日之訟惶恐自疑後  
師中方坐事廢黜一日擢為高陽關安撫使賜  
對日神宗諭曰韓琦力薦卿有才故委以方面

師中方大愧服特枉道至相臺謝公公所至惠愛及人既去思慕不已往往畫像事之揚州泰州真定太原京兆府皆有公祠魏人仍立生祠為塑像歲時奠獻以此狄梁公天下士大夫識與不識及里閭田野之人聞公之名無不咨嗟瞻慕至夷狄尤畏服公名凡奉使契丹者虜人未嘗不問公安否今在何處信使過北門京尹往來書例用押字公至則易以名副使成禹錫仍諭來介曰今以侍中在此故特書名及公既去來者亦欲使彼名數強之卒不肯從每南來涉臨清界即戒於下曰此是韓侍中境內謹勿

顏頤素忠彥奉使至帳前館伴楊興功謂忠彥  
曰早來上面及曾使南朝識韓侍中者數人問  
之少卿貌類父否皆云頗類遂於宴坐今畫亡  
密圖之而去公孤忠直道惟范公富公氣類相  
同相知最篤及論事於上前繫國家利害則各  
正色辨論未嘗以私相符同退而皆不失驕三  
公名重一時天下稱為韓范或韓富希文嘗遺  
杜祁公書曰天下始終不變者仲淹惟敢保韓  
富二公而已公輕財好施不計家中有無賙人  
之急惟恐不豐或求之愈數而意愈不倦俸祿  
之入月未終而已竭是以天下之士皆歸之至



於自奉養則儉約不改於舊左右侍者不過二  
三人嘗曰吾閨門之內如當日朝官時無以異  
也內外宗族割俸以養之者常十數家嫁諸兄  
孤女十餘人教育諸姪皆有成立所得恩例常  
先旁族交舊之子孫貧而無託者如尹洙石介  
之家亦分俸以給之公天性清簡至於圖書博  
弈聲伎之娛一無所好獨觀書史晝夜不倦家  
藏圖籍萬餘卷卷末皆題曰傳賢子孫餘暇則  
喜書札素愛顏魯公書而加以道健自成一家  
八觀公字體皆曰端重而剛勁類乎為人公孝  
於祖宗常恨祿不及親饒所有以奉塋域公上

代祖葬博野曾祖葬贊皇雖家諫具載葬地值  
五代兵亂常趙並邊復有北胡之患子孫避地  
多故於歲時灑掃益不能及歷祀既遠遂忘所  
在公常刻志求訪嘉祐三年得曾祖府君之墓  
于贊皇八年得五代祖庶子墳于博野三塋之  
失所在百有餘年公卒能訪而得之世歎公孝  
誠所感云公娶尚書工部侍郎崔公立之女追  
封魏國夫人男子六曰忠彥次端彥次良彥次  
純彥次粹彥次嘉彥女子四長不育次澄朝散  
郎王景修次二人不育孫男曰治曰戰曰澡曰  
誠曰浩曰澄曰哲曰括曰拓曰裕曰楮曰洞曰

格曾孫曰肖胄曰肯胄曰碩胄曰膺胄曰顯胄  
曰宏胄曰頴胄曰全胄曰安胄曰寶胄曰膺胄  
曰頴胄公薨後歲餘右侍禁孫勉監元城埽一  
埽多墊陷費工料勉詢知有巨竈穴於埽下乃  
伺龜出射殺之後數日勉方書臥有一吏持檄  
召勉曰有竈訴爾當往證之既隨吏行過一宮  
闕甚壯守衛皆金甲吏兵勉詢之吏曰紫府真  
人宮也勉詢姓氏吏曰韓魏公勉忽省曰我故  
吏也亟往求見焉既入望魏公坐殿上衣冠若  
世間所畫神仙也侍立皆碧衣童子勉砌下俯  
伏哀訴不已公微勞云汝當往陰府證事予勉

具述殺龜事又叙豈蒙薦舉今入陰獄恐獲罪  
不得還懇求庇助公乃命取黃誥示之謂曰龜  
非與人同被害汝婦戮之汝職遣之使去出門  
所追吏曰真人釋爾吾何敢攝也青衣人引勉  
至家遂寤事既傳播一日神宗謂輔臣曰聞說  
韓琦為真人事否曰未之聞也上具道所以咨  
嗟久之孫固時為知樞密院退而謂所親曰如  
韓公平生所為豈不為真人乎元豐中忠彥以  
墳墓久闕照管乞弟粹彥監相州酒稅神宗御  
批曰韓琦有功於國非他臣比特依所乞仍令  
吏部今後常注其見在仕子孫一人隨本資任

或親民監當州一差遣國朝以來臣僚之家  
未嘗有此乃非常之恩也

忠獻韓魏王別錄上

賜進士監察御史安陽張士隆重刊

公至和中自相州入西樞為大尉嘗以建儲為  
言既遷丞相每乘間必及之援古喻今前後益  
數十矣一日仁宗忽開悟公賀曰堯舜之心也  
社稷幸甚上曰然則誰可者公曰宗室之賢唯  
陛下所擇上曰昔嘗養二人為子一人者不慧  
公曰既不慧更不須論上曰如此則唯宗實可  
公曰陛下既已知之則定矣遂命判宗止以試  
之公已得請於仁廟許立嗣矣而宮人宦官環

泣於內大臣小臣橫議於外上意復動臨朝默  
默不樂公每顧上顏色不知身之所容也洎因  
英廟謙訕久之不肯就宗正而上意尤懈迺  
曰不如且放下公復從容獨對曰天下人已知  
之而中輟非朝廷舉動也彼退避如此廼是有  
識豈可遂已上釋然曰既如此不如便就明堂  
前與了當公又進曰且為皇子以待聖嗣立則  
必自求歸邸上頷之即日乞宣樞密臣寮諭之  
既而張昇至失聲言曰許大事如何容易便做  
不教臣知上笑曰議已定不須驚也當日下午  
便降文字英廟既即位之數日初掛服於柩前

未發而疾暴作連聲大呼語之恐人所不可  
聞左右皆反走大臣輩駭愕竊立莫知所措獨  
公亟投杖於地直趨至前抱持入簾曰誰激惱  
官家且當服藥內人驚散公呼之徐徐方復來  
遂擁上以授之曰皆須用心照管官家再三慰  
安而出仍戒當時見者曰今日之事惟某人其  
人見外人未有知者復就哭位處之若無事然  
歐陽永叔歸以語所親曰韓公遇事真不可及  
也其廟初以爲驚疑得疾久之疾已平而疑未解  
潛晦自居猶若疾者面壁堅卧莫肯受樂餌公  
日午司列入自捧藥以進公俯而懇告則或熟



視公而不言或取藥以覆公之衣而不顧公或  
跪於榻上者移時或拜於床下者數四大后在  
燕間每勞公曰相公亦不易勝矣大王汝自勸  
公也及大王勸之尤不顧也然須公強之而後  
服英廟疾時太后一口遣使持一封文字至中  
書直以授公公啓之迺疏列上禁中縱意事其  
極曰老身今無所容相公當作主也公讀訖而  
懷之雍容以語使者曰但做某奏太后道太后  
常自言官家心神未寧帖心神未寧帖之人言  
語舉動不中節何足恃也安則自無矣太后意  
遂解英廟之疾中外莫知其誠偽且遇紹瑞少

息禮左右不悅多道禁中隱密者雖大臣亦心  
惑其說顧未敢發口爾獨公屹然不為衆說動  
一日昌言曰豈有前殿不曾差了一語而一入  
宮門得許多錯某好疑此事自爾人情覺公意  
不可搖遂不復有妄傳語言者英廟既驟自外  
來又方寢疾不預事人情傾向在太后公憂宮  
中有不可測者一日回對於簾下深以言動太  
后曰臣等只外面見得官家裏面保護全在太  
后若官家失照管太后亦未得安穩太后驚曰  
相公是何言語自家更是用心公即曰太后照  
管則衆人自照管同列為縮頸流汗既出吳長

文曰語不太過否公曰不如此不得公既潛察  
英廟已安而曹后未有還政意迺先建議於英  
宗曰可一出祈雨使天下之人識官家上然之  
遂以咨太后太后怒曰獨不先稟此邪孩兒未  
安忍未能出公曰可以出矣太后又曰人主出  
不可不備禮儀方處喪素仗皆未具公曰此心  
事朝廷順旨即辦不數日喪杖成上遂幸相國  
寺京師之疑以解而太后不久竟歸政曹后初  
未還政公力引古以勸之云前世母后更聰明  
者莫不以問咨權位敗名德太后若脫然便能  
復辟則千古所未有請自開史書一一可見不

類也后曰自家何者敢望賢人公察其意回矣

即連贊之後數日批出文字云自某日更不御

殿公亟令卷簾撤坐廼往白上上曰莫未否公

云已得親詔矣上遂釋然初曹后難於歸政公

說云當別為太后議儀制山呼警蹕之類太后

既允即以諷上上正色曰相公苦崇母后豈是

事公曰臣等以此誘勸之方肯放下陛下何

由此邪若以輕重比之與者止如鷄卵而放下

者如太山富公亦贊云何啻太山事遂定曹

后雖臨政只在一小殿中屢曰此是何坐處公

每對他事不應也真有微意哉仁廟山陵已成

靈駕至鄭下而傳聞皇堂石裂架以大木矣衆人駭懼未有以處公獨曰果然則便當別為不可病遲而憚費人臣於此豈當苟且既而適妄云

忠獻韓魏王別錄中

賜進士監察御史安陽張士隆重刊

公曰能平得有已之心則為賢矣人人莫不能道之及到行時大是難事常合著意于此勿以為易也公嘗曰內剛不可屈而外能處之以和者所濟效矣公曰君子當先處已至於義足而後委之命可以無悔公曰閱人效矣久而不變為難公曰以之遇則可以成功以之不遇則可以免禍者其唯晦乎公曰中等以下人見利則去是其常情不須恠也公曰人情微處當深體

之若直用己意以處則所失必矣公曰知其為  
小人便以小人處之更不須校也公元勲盛德  
如此而聞人一小善則曰某不及矣公曰君子  
循理而動靜以自居禍福之來非所惑也公曰  
人能扶人之危調人之急固是美事能勿自談  
則益善矣公曰汎交之道與其所長而避其所  
短則歡心得矣公曰處己以難處人以易則無  
所往而不服矣公曰寡欲自事簡公曰能識理  
則事事無礙矣公曰論待君子小人之際公曰  
一當以誠但知其為小人則淺與之接耳凡人  
至於小人欺己處不覺則己覺必露其剛以破

之公獨不然剛足以照小人之欺然每受之而不形也公性至仁然其臨事或誅一人與答一人顏色不覺有異也公曰欲成大節不免小忍公曰君子業履須當積微放過一事便為小人所窺矣公之客有被召而請教者公曰富貴易得名節難守孫和甫奉使虜中過魏因請教于公公曰但勿以其為夷狄而鄙薄之甚善凡人語及其所不平則氣必動色必變辭必厲惟公不然更說到小人忘恩背義欲傾已處辭和氣平如說尋常事也公曰某平生仗孤忠以進每遇大事即以死自處幸而不死事皆偶成實天



扶持之非某所能也

忠獻韓魏王別錄中

忠獻韓魏王別封下

賜進士監察御史安陽張士隆重刊

天聖五年三月二十四日唱進士第於崇政殿  
甲科未絕而日五色于時群臣皆賀後議者以  
為公同升諸公雖多至二府然終福祉稷則獨  
在公焉趙良規賓客嘗曰公初入館時方二十  
餘歲亦未有事迹著於人者然人意已自以公  
輔許之不知其何也仁宗朝李都尉喜延士大  
夫盡聲色之樂一時館閣清流無不往者公於  
其間獨為年少獨未嘗造焉李數召而數以事

辭人有強之者公曰固欲往但未有名爾公處之而不失和李既莫得以怨同時諸公亦不以為介也石曼卿意氣豪俊同時諸人無不被凌譴者獨未嘗侵公也公曰某以誠待之而已公言王沂公器德深厚而寡言當時有得其題品一兩句者人皆以為榮某為諫官時因納劄子忽云近日頗見章疏甚好只如此可矣向來如高若訥輩多是擇利希文亦未免近名要須純意於國家事爾公聞此言益自信也公言王沂公當國時門下未嘗見顯拔一人物希文乘間輒諷之曰明揚士類宰相之任也公盛德獨少

王沂公徐應之曰司諫不思邪忌若已出怨

將誰歸希文惻然自失退而嘆曰真宰相也公

言希文師魯皆畏沂公師魯初入館編校四年

後欲得一差遣遂自至中書援錢延年例沂公

徐曰學士自待何為在錢延年等例邪師魯終

身以為愧公嘗言天下事不能必如人所望仁

宗朝王隨陳堯佐為輔相皆老病而不和中書

事多不決韓億石中立參預又頗以私害公公

時為諫官屢疏之不納後物議益喧公復上章

乞寢辭上迫于正論遂盡罷四人者然當時天

下之望在王沂公呂申公杜祁公范希文而公

亦引薦之及宣麻之日迺張仕遜昭文章得象  
集賢宋庠晁宗慤參政天下大失望公曰事固  
如此不可知人意不能必也公既攻退四執政  
朝廷議欲以知制誥寵其盡忠公曰諫行足矣  
因取美官非本意也人其謂何語聞事遂寢公  
嘗言章得象在中書時方天下多敝事且有西  
鄙之患每與范希文富彥國以文字至相府欲  
發論議輒閉目數數珠不應人彥國憤惋數欲  
悖之希文惜大體不許也公言希文嘗與呂申  
公論人物申公曰吾見之多矣無有節行者希  
文曰天下固有人但相公不知耳相公以此意

待天下士宜乎節行者之不至也劉元上僊仁  
宗欲以楊太妃為太后以問申公申公曰典故  
無此事上曰柰已許之矣呂曰太后樂乎上曰  
樂之呂即曰唯唯陛下宮中甚孤立不便呂以  
此意密語公時諫官御史知其非而畏其說竟  
不敢爭也先是宮中以劉為大娘楊為小娘公曰呂公固多不  
正以結上然皆有說以勝人人亦不能奪也劉  
后服未除而勸仁宗娶曹后希文進曰又教陛  
下做一不好事他日呂語某云此事外人不知  
劉既上僊官家春秋盛郭后尚美人皆以寵廢  
以色進者不可勝數已幾於昏矣不立后無以

止之公曰每事自有深意多此類范公作諫官  
申公不悅王隨迺面諷希文云隨近日效引師  
巫出入及其事某事皆可擊也希文云某不知  
其詳未敢聞命只知希文不納恐事洩反以語  
隨云范司諫欲奉言某事某已勸之且止矣公  
曰呂申公極有機智雖忌正人然亦未嘗敢全  
踈棄之公言杜祁公心至公而樂與人之善既  
知其人無復更有毫髮疑問始其為樞密副使  
而杜公為太尉某輒論難一二事而杜公不樂  
人或諷解之迺曰某長渠三十歲尚有誤邪父  
之既相亮即每事問曰公不滿意出為泰州唐

原缺



京大內壁間有太宗詩意在燕薊辭筆甚壯公  
之來得旨修護之既而客有勸公進此詩者公  
曰修之則已安用進客亦莫諭公既去韓絳來  
遂模本以進公聞之嘆曰昔豈不知進耶顧上  
方銳意四方事老臣不當更導之耳凡將相隨  
行公使錢令子弟王之遂以給私用無復限量  
獨公不然所至一以屬本郡月之所給亦隨衆  
人皆著為例例所不當得一毫不取其外博施  
而內持約如此自唐以來守北門者不知幾何  
人唯狄梁公有生祠公之去魏魏人亦立生祠  
於熙寧佛寺儀彤宛然每公誕辰士女焚香於

堂小民獻技於庭者終日不絕公聞而笑曰我  
尚生也而如此邪及公薨魏人之來赴者甚歟  
而就哭於祠下者在衆近古未有也公昔在定  
武時為資政定武故老至今曰自家資政在并  
州時為太尉則曰自家太尉在相魏時為侍中  
則曰自家侍中其所至得人心如此雖去鎮十  
餘年相遠千里外每公誕日為壽者常不絕公  
在相州一日被司農檄括車以為營衛籍老幼  
以備入保鄰城已騷然矣公懷檄不下方草奏  
以言疏未上司農已旋覽亟止前檄故獨相民  
未嘗驚也公嘗從容議及養兵事慨然曰某有

所思而得之者未嘗以語人人亦未必信養兵  
雖非古然積習已久不可驟又自有利處不為  
不深昔者發百姓戍邊無虛歲父子兄弟常有  
生離死別之苦議者但云不如漢唐調兵於民  
獨不見杜甫石壕吏之詩乎調兵於民其弊迺  
爾後世既收拾強而亡預嘗養之以為兵良民  
雖欲歛差厚而終身保骨一相聚之樂此豈小  
事又其練習戰陣而豪勇一使安得與農夫同  
日而道也王安石初罷相時實不召與司馬君  
寔百姓相傳云侍中三詔猶以疾辭司馬家兩  
詔亦不肯行其為當時屬為至愛嚮如此公嘗言

吳長文有先識方天下盛推王安石以為必可  
致太平時長文獨曰心強性狠不可大用後卒  
如其言公晚年相歿疾忽忽少意思容兒羸  
削非復故時巖叟嘗因從公出游聞道傍觀者  
之語曰見侍中令人感動公身在外心繫社稷  
老而益篤病而不忘每聞安石更祖宗一法度  
朝廷一紀綱則泣血泣血或終日不食熙寧  
八年三月上遣近璫齎詔問公曰兩朝通好垂  
八十年近歲以來生事尤甚代北舊疆自有定  
分比亦遣官按行經界甚明朕亦回輒諒盟好  
固欲優容虜情無厭勢未可已今橫使再來意

在必得祖宗舊地決難順從若事有不測其  
奈何矧夙著忠義歷事三朝廼心罔不在王室  
國有大政謀及故老今待遇之要備禦之方如  
何卿宜密陳朕將親覽公慨然曰事至於此難  
於從半塗間理會須講其所以致之之由廼可  
因條六疑以對其略曰開熙河曰通高麗曰置  
保甲曰修城壘曰創軍器曰分將官此皆所以  
致其疑者故先撓我以自為計爾實未敢輕動  
也宜遣使報聘優致禮幣示之大信告以至誠  
極陳祖宗以來盟好之重盡解所疑則自無事  
矣祖宗舊地圖牒甚明一寸不可許也又引及

熙寧以來事曰廼始謀者之誤爾陛下若堯之  
仁舜之聰知所誤而改之不吝聖人之盛德也  
其終曰臣歷事三朝十年輔相位已極矣年幾  
七十榮守本邦無不足今日之言非沮善也非  
求進也但天下之人浸不敢以直言聞於陛下  
臣實憂之願陛下不以臣言為疑早悟以為宗  
社盛福非老臣之幸天下之幸也凡三千餘言  
公自手寫疏既上公曰言行或有益於國不行  
亦老臣無負矣公又面語使者曰橫使雖傲慢  
不肯去第勿恤待以常禮使之久留不害也且  
復選使使虜就議則渠自難安矣見上請作韓

某如此言此使者歸朝廷已許其地而蕭禧還  
虜矣公起堂於此第池上以倣樂天因名曰醉  
白堂五月堂成公賦二詩其一卒章云霓裳百  
指非吾事只學醺酣石上眠自是寢疾以六月  
二十四日薨此詩遂為絕筆既而上遣使持為  
石藏以葬公始悟石上眠之句若讖云公薨士  
大夫恨勲德之難名也皆嘆曰天何不畱歐公  
為魏公作誌文而後死也

忠獻韓魏王別錄序

涇州觀察推官判主官太府路機宜文字主

歲更

熙寧四年秋河決魏北家府以都水丞待罪于  
魏巖叟始得見魏公五年夏公薦以為北京國  
子監教授其冬又辟以就幕府六年春公得請  
守鄉郡又延之於安陽公既在安陽歟暇日而  
巖叟閑居且無職事方得從容獨侍公於便坐  
公不以為不可與言而開心寫誠無復間外其  
間事有時人之所不知言有古人之所未到退  
輒書而藏之記或末詳則他日再叩以獻其  
說方貪嗜未足而八年六月我公已薨嗚呼清



風在堂俄隔萬古望斷霄漢不聞餘音痛念二  
年之間公以疾居於內而巖叟以行役於外者  
既已三之一良時美景與衆賓並進於宴賞之  
間者又三之一則間見於公益無幾矣竊自恨  
其生之晚而識公之不蚤見公之不數而問公  
之不多也姑悉所聞見者泣而次之以為公別  
錄云

乙卯七月十五日

書 忠獻魏王章表後

忠獻王相三朝蓋自仁宗末年請外未得而仁宗升遐英廟踐祚爲山陵使事畢求去又不得後繼有請英宗責以終喪最後許俟過郊禮禮畢又遇大故神廟臨御永厚陵返虞力援故事求去其自序曰自仁皇嘉祐之末迨英廟治平之間求解四五年奏數十上固可考也自甲辰至丁未閱四年奏又數十上乃得永興其釋相位可謂難矣而邊事方擾委任蓋亦不輕比西方稍寧乞鄉便郡八請乃得相未幾移大名以病乞徐四請不允踰二年乞移邢相是欲爲歸

計矣四奏反加節再任再辭不聽乞納節再任  
又不聽滿三年又乞納節移刑相至奏七上蓋  
寶年高抱病俞音終闕又暮年再乞乃得相甲  
寅之秋遂乞致仕時年已六十七奏章歷陳疾  
病必非飾詞四奏訖不遂請乙卯再請二狀尤  
極懇迫卒不見報其殆薨于郤矣夫難進易退  
畏遠權勢者固君子之所優為然君方賴我如  
手足民方望我若父兄治功未向於成則雖視  
隆名重位如重牢桎梏夫亦安得遽去以遂其  
誠心哉王在仁宗英廟時蓋如此迨神考即位  
適年總覽權綱其太有為之志固已可見抗章

累數十竟釋相位無遺恨矣永興秉鉞猶分重  
寄至於典鑰北門雖曰內隆禮遇外鎮邊夷然  
時移事變揆王之心豈曰宜然守郡條而賦民  
政必有非所願爲者而徘徊隱忍年與病侵竭  
誠控告始得鄉郡二年之間引病休致尤欲避  
貪榮戀祿之嫌見守道厲節之懿雖不克伸世  
孰得而議之然道德之尊功業之盛上不得在  
朝廷以致君澤民下不得安田里以遂志養病  
後之人撫其遺蹟得不重嘆也哉昔東坡跋歐  
陽文忠公書曰士非進身之難乞身之難是固  
名言然戒後生之汲汲可也二傑名德冠絕

一時時不我捨亦不卒大用王誦文忠之言曰  
時方尚新奇而臣思守拙世方興功利而臣欲  
循常亦其心也區區進退難易殆未足以議其  
方云左朝議大夫徽猷閣待制提舉江州太平  
觀程瑀書

易學序表後

忠獻靖遠王遺事

翰林院直學士奉郎掌書職方員外郎蘇都尉張至 編次

進士監察御史安陽張士隆重刊

公自定武入為樞密使時仁宗嗣未立公頃置  
內學教宗子建儲之意默存其中事未及行公  
重致仁宗倦勤甚勢漸逼更不暇置內學每進  
對殿郎論太子天下本不可不預立以繫天下  
心語日益深切如是者前後不可勝數仁宗終  
無一言不喜亦不怒公患之他日仁宗忽顧公  
謂朕亦有意多時時有二宗子嘗育宮中公乘

其意動急叩之謂二宗子陛下必自能見其孰  
聰明智否可屬大計仁宗以英宗為言公即將  
順以彼一人便若幽厲語更不及英宗乞降聖  
旨制子權判宗正司後兩府通簽御劄張昇太  
尉見之懼深罪公何不素議及次日殿上大言  
此事繫社稷陛下不可錯上徐曰此事與相公  
經商量來昇下殿至中書又詰公公曰此甚入  
思慮米不錯昇退公笑曰若與之素議豈不壞  
了事後英宗畏避不就職幾半年竟以事迫便  
作皇子仁宗彌留英宗即位之次日疾作不能  
臥朝終壽攝政疾每甚即獨召公責曰相公自

不取公謂不須如此但服下延藥自無事公嘗  
藥以進英宗怒以藥覆公公徐進藥而退慈壽  
一日又獨召公入英宗疾作甚直卧二王謂公  
曰何不立長君此輩做不得相公錯也公退立  
俱無言慈壽一日又謂公人皆謂錯公曰不錯  
慈壽怒曰文字滿前後雖大臣亦有言者公力  
開陳以爲不然卒能翼清躬復大位皆公力也  
英宗寢疾時公一日進對罷謂慈壽曰上疾須  
太后護眠若止不豫太后亦未得安慈壽怒曰  
相公是何等諾當時同列皆謂太峻退至中書  
往往責公公曰諸君不思耳兩宮素相疑彼又



內事皆存乎天性既薄若狃於權位操於閹宦  
女謁之言或有不測何以禁之衆服其遠識後  
魏宮中果調護日益加上後疾愈慈壽不肯還  
政公每進對辭即陳歷代母后之戒權位不可  
久居久必有禍后必嘗觀史知之慈壽曰婦人  
豈知讀書慈壽色勃聲厲前後以十數他日復  
請謂若復辟後禮數必有加不敢損如不然臣  
獨當責慈壽曰此言何足據慈壽一日忽謂公  
本欲且管三二年教養疾相公適如此公乘機  
力陳上前日出初雨雨應百姓又皆知上無恙  
天人如此不可不還政次日遂批出還政英宗

既隨朝公請加慈壽禮數英宗曰相公休嘆縱  
母后公曰慈壽之始深不肯放下臣誘以利害  
動以禍福僅能復辟彼遺太山之重陛下廼惜  
一鷄子輕英宗尚遲疑富公在其旁颺言曰何  
啻太山議遂決即建慶壽宮歲時稱聖躬萬福  
出入加儀衛焉人有以使永昭陵後公不退為  
問者公曰是時英宗始立疾作不任事慈壽懷  
二三時在末昭一日遣一近璫小封親札諭英  
宗狂惑等事問相公如何公報云若語言無節  
慈壽既云未定疊未定疊人語言何足恠他日  
復遣使見逼甚公曰只乞與曾公亮已下商量

曾公輩果不敢當皆云候韓琦回公是時既使  
回且正內變矣一日奏對罷直論以為太后既  
無親出子上奉養在宮中又先帝有詔與子其  
於子母不為不順若更懷猶豫聽讒佞禍亂由  
此必起立人之子人皆知不若立己之子然太  
后既無子不得不自認業茲壽由此詔罷不復  
出口琦是時豈暇自顧進退之分未幾英宗上  
僊今上即位一日遂懇辭位上流涕謂相公欲  
何之琦一口又盡持四方士人見責不退書開  
陳以謂清議不容如此豈敢安位上又流涕不  
語請益他日忽宣諭已有恩命云亦不久在外

唐冢那以待故除兩鎮有素衣待還之語公復  
延見謂制語太過使臣不得安外乞改之上不  
許遂之相復移雍上使諭之只候西師回召既  
而召見某是時已知不可為堅請還相次改北  
門事由此分矣仁廟疾欲立英宗時允弼最尊  
屬心頗不平且有語一日仁宗疾亟英宗已立  
親王皆入後殿國朝制度嗣天子即位先親王  
賀次六軍次見百官公是先時獨召允弼入稱  
先帝晏駕皇子即位大王賀允弼謂皇子為誰  
曰某人允弼謂豈有團練使為天子者何不立  
尊行公曰先帝有詔允弼曰烏用宰相遂循殿

陞上公叱下云大王人臣也不得無禮左右甲士已至遂賀次召諸親王見六軍百官中外晏然英宗立數日百官朝脯臨兩府立殿兩廡上垂簾時英宗忽疾作厲聲大呼謂殺某二府愕眙不知所處公獨拔哭杖塞簾入見上廼疾作非有他變宮人壁後遞去不敢前公廼扶土呼左右翼入時曾公已下皆汗浹背以事出不意也英宗初晏駕急召上未至英宗復手動曾公愕然亟告公欲止召太子公拒之曰先帝復生廼一太子皇愈促召上其達權知機如此英宗初立外六班有謀變者或言於公公曰事不成

不遇族耳吾不懼也既而卒無事英宗即政公  
以其勇智不世出可與有為迺考尋中書祖宗  
御批得百餘番俱缺落不識補綴僅能識其  
字畫皆經國長算大策如取大原下江南伐大  
戎付中書之類編成十餘軸一日袖進英宗一  
見之不覺避御座是時同列皆謂公有不言教  
焉棄事業後上僭公哭之慟曰何事不可為今  
上初即位慈壽一日送密札與公論及高后與  
上不奉事意有為嬖婦作主之語仍敕中貴俟  
報公但曰領聖旨一日入劄子以山陵有事取  
覆乞晚臨後上殿意他公莫與既見謂官家不

得驚有一文字須進呈說破只是不可泄上今日皆慈壽力恩不可忘然既非天屬之親願加意承奉使自無事上曰謹奉教公又云此文字臣不敢留幸宮中密焚之若泄則問遂開卒難台上唯唯後二宮相讎人莫能窺其跡仁廟靈駕欲到永昭葬且有日道路忽傳皇堂棟損有司憂駭不知所出公至鄭始聞時諸使見公鈞公指皆欲不問而掩之公正色曰不可果損當易之若違葬期後所費此責猶可當亦無可柰何若苟掩之後有壞覆人主致疑心臣下何以當責一坐為之嘆惜服其不苟處事必盡職且

公遂既到皇堂棟廼不損熙寧中公自長安入  
觀朝廷欲留之公陰知時事遂堅請相陞辭日  
上謂卿去誰可屬國者公引元老一二人上默  
然問金陵何如公曰為翰林學士則有餘處此  
地則不可上又不荅公便退後有問公何以識  
之公曰嘗讀一金陵荅楊忱書窺其心術只為  
一身不為天下以此知非宰相器太宗真宗嘗  
憚於太名之郊賦詩數十篇賈魏公時刻于石  
公留守日以其詩藏置於班瑞殿之壁既成或  
請打石本以進公沉念謂其詩有衛霍為鷹犬  
及有復山後之意恐益啓之遂止後子華守北



門首獻焉有問公郭達衆人謂皆出公力公曰  
此等事非人臣得自專須還他主上若用人是  
則將順非則開陳何謂某力始英宗欲用郝質  
在西府公謂質固得但二府論道經邦地使一  
黥卒處之恐反使不安如狄青才業為中外所  
服一旦居此論議卒紛然而去愛之適所以害  
之英宗沉吟久之曰如此則用郭達琦亦以郭  
達粗勝質遂然之既阻其一又阻其次不可王  
固遂見誣以引往年之廝役又曰此事惟趙  
師知之是時同議以為太躁等常近下安排  
目遂有權同簽書之號公嘗言范公一日見

沂公謂宰相當顯拔人物為朝廷用自丞相當  
國門下未見一人沂公曰司諫不思邪若恩盡  
歸已怨使誰歸范公恍若自失退語公曰真宰  
相罷公論近世宰相獨許裴晉公本朝惟師服  
王沂公又嘗云若晉公點檢著亦有未是處君  
子成人之美不可言也不知公摘晉公何事恨  
不得聞之或問公威克厭愛允濟如潞公臨大  
事全是威何如公曰待威而後濟者亦是也然  
有不須威而能濟者觀公意豈以德不足者必  
待威以立事邪古人謂鵠鶚百鳥望而畏之鸞  
鳳百鳥望而愛之其服則一其品固相遠矣公

嘗謂大臣以李固杜喬為本其弊猶恐為胡廣  
趙戒以胡趙自處弊可知也此可見公出處大  
節公嘗謂處事不可有心有心則不自然才自  
然則擾太原土風喜習射故民間有弓箭社某  
在太原時不禁亦不驅故人情自得亦可寓武  
備於其間後宋相繼政頗著心處之下令籍為  
部仍須用蒲弓太原人素貧只用木弓矢自此  
有費牛置弓者人始驩然矣此蓋出於有勝心  
也公嘗言其廟議配享清議皆與沂公不與申  
公誠意不可欺如此又曰頃時丁寇立朝天下  
聞一善事皆歸之萊公未必盡出萊公也聞一

不善皆歸之晉公未必盡出晉公也蓋天之善惡爭歸焉人之修身養誠意不可不謹公謂沂公為相論其事則無可數者論其人則天下信之為賢宰相其品何如公謂申公以進賢自任息婦於已時士皆出其籠絡獨歐范尹旋收旋失之終不受其籠絡公謂雖然忠義奮不顧身師魯之所存也身安而後國家可保明消息盈虛之理希文之所存也敢問二公孰賢公曰立一節則師魯可也考其終身不免終亦無所濟若成就大事以濟天下則希文可也公謂論性之極不可變君子謹言恐廢其學然學者要在

隨其性以脩至於成德皆可入聖若不揆性而  
遠求恐其反喪本終亦無所至不可不知公惟  
務容小人善惡黑白不太分故小人忌之亦少  
如富范歐尹常欲分君子小人故小人忌怨日  
至朋黨亦起及其極君子消退巨公大人有不  
能出力救之者方諸公斥逐獨公安焉一日王  
君旣見公謂稚圭不如拔出彼黨而退下來公  
曰琦惟義是從不知有黨君旣不悅而去後扶  
持諸公復起皆公力士君子立朝不可不知此  
石守道編二朝聖政錄將上一日求質於公公  
指數輩為非其一人祖時嘗惑宮髻未眠朝晏群

臣有言太祖悟潛伺髮方酣寢剋殺之公曰此豈可為萬世法已溺之迺惡其溺而殺之彼何罪使其復有孽將不勝其殺矣遂去此等數事守道服其清識公執政臺諫有言訐不當理或涉薄害風教者皆密封之終不示人呂誨趙瞻言濮園得罪御批與廣南別駕公引陳與善地以來言者入謂公性根有仁義公平日論時望諸公皆不以經綸許之謂才罷須周可當四面入應麟入細迺經綸事業今皆可當一面才也公在相臺作久旱喜雨詩上句言雲動風行雷雨自解之事繼句云須臾慰滿三農望却歛神功

寂似無人謂此真做出相業也公在北門重陽  
燕諸漕於後園有詩一聯云不羞老圃秋容淡  
且看寒荅晚節香公居常謂保初節易保晚節  
難故晚節事事尤着力所立特欽宗廟諱又作喜畫  
詩一聯云危石益深鹽虎陷老枝擎重玉龍寒  
人謂公雖在外自任以天下之重如此公為詩  
用意深非詳味之莫見其指畫此類也劉御樂  
好收古畫多求諸公跋尾數冊上有金書字悉  
上筆餘三冊公卿多題于後劉到北門宣公出  
畫冊謂獨未得公數字為恨公題云觀畫之術  
無他緝逼真而已得真之全者絕也得真之妙

者上也不得其效非中郎下矣持吾說以觀

氏之書其可逃乎哉安陽春叟病中題

宗問人謂此術不獨可觀畫亦可觀人物也

公題皆論一語有問產升村品於公者公曰慙直

而且忠於人然過步減頂非伊分上所有或問

之為其膽力薄公平日謂成大事在膽未嘗以

膽許人往往自許也或問若實晦叔天下所屬

望他時入用何如公曰未偏規摹小問晦叔平

日公曰今日迺是平日人有疑公待君子小人

均以誠往往為小人所欺奈何公曰不然亦觀

其人如何隨分數放之耳人謂公待人誠則皆



誠但有深淺以明濟之也豈可以為小人不待  
以誠邪皆嘆以為不可及公平日贊進人物極  
傳正心許者不過一二人多見其與人長忘人  
短而用之謂太濫其實學中不啻黑白在北門  
時一屬官有小事不知道公欲委以事人謂公  
真許之他日或問公曰某人但受任術所為不  
元祐廟諱篤大中其弊公為陝西招討時師曾與英  
公不和師曾於公處即論英公事英公於公處  
亦論師曾公皆納之不行遂無事不然不靜矣  
公論為甚其初往往能持久而不變為難計日  
計月為之者甚歟也公語小人害君子猶蜂蠆

之請物違之正使不能加諸人可謂善處矣公  
云臨事若慮得是當判定脚做更不移成敗則  
雖知此方可成務又云孤忠每傾神道相助幸  
而多有成其至誠自信如此孔嗣宗任河北憲  
司農召議役法別公請言公不荅請益堅公曰  
故舊不當無言此行但為河北說得些衆人不  
敢道者是矣嗣宗臨上馬又曰富貴易得名節  
難保嗣宗喘不懌者數日終不能自克吳長文  
環素以勁挺有器節稱公亦稱之及幕府有闕  
門下有以環為言者公曰此人氣雖壯然包畜  
不深發必暴且不中節當以此敗置而不言不

踰年環敗皆如其言趙君錫被召別公請教公  
曰平日之學正為今日此若不錯餘不錯矣終  
不語及他事又請云若上問某事以何對公曰  
此則在廷評自處李清臣平日公前多論釋氏  
貴定力謂無定則不能主善公每然之後朝廷  
斥異論者李進取頗持兩端公因書開之比來  
臺閣斥逐紛紛吾親得不少加定力邪公之善  
論人如此公言狄青作定副帥一日宴公惟劉  
易先生與焉易性素疎訐時優人以儒為戲易  
勃然謂賊卒敢如此一譏詈武襄不絕口至擲  
樽俎以起公是時觀武襄氣殊自若不少動笑

諫益溫次日武襄首造劉易謝之公於是時已  
知其有軍事師中為布衣父鎮戎退陣當斬公  
馳至鎮戎以賊衆我寡非諸將罪且欲戮其為  
首一人師中父在貸中方請于朝時師中赴南  
宮試遂上書論公募民為兵往應賊太擾乞斬  
公以謝陝西既不行後嘗有疑公心執政有請  
勿害師中者公笑曰彼是時以子救父豈可加  
罪人聞之咸服其公恕然師中終未之信後擢  
為副師中方愧服且深謝之公兄為泰倅孫  
元規為司理嘗薦之公遂拜元規書問未嘗踰  
時下講後公為西帥兵敗元規領言責深議公

罪朝廷知罪不在主帥必謫即復自此元規懷  
公書問遂絕公一日以書問元規平日事契如  
此若以伯氏嘗薦而後見攻此廼韓耿之舉也  
若琦當言責亦不為元規隱此何待琦之不廣  
願公勿疑元規亦疑之終不講書公秉政頗以  
公有言已心後起廢為慶帥元規過闕廼泣見  
公曰汚真小人公知汚汚不知相公公與樓澈  
有舊數到大名干公公待之厚或以澈為人言  
者但曰人材難全公以恩及人無求德心故所  
及者廣所感亦深平時非不知人之欺終不別  
白能受其欺賤官因事爭於前每及已之誤即

受之事行其直者不主已為是若稟事嘗計觸  
非而却之異日復稟終不以前日芥蒂置於色  
亦惟是從之公因論退曰處去就之難者不可  
猛而有迹公每聞新執政用一人嘆曰放上則  
易放下則難公嘗戒人不可任性當臨事有所  
裁處方不失中道公言王文正母弟傲不可訓  
一日過冬至祠家廟列百壺於堂前弟皆擊破  
之家人惶駭文正忽自外入見酒流滿路不可  
行俱無一言但攝衣步入堂其後弟忽感悟復  
為善終亦不言公因語華相在北門頗姑息三  
軍公曰御軍自有道嚴固不可愛亦不可若當

其罪雖日殺百人何害人自不怨公言富公為  
鄆倅沂公作安撫使一日謂富公即日當某位  
富不敢當沂公曰然進則易退則難公言仁廟  
御批朕用韓琦富弼范仲淹皆公議人望之所  
歸凡所議事仰章得象杜衍已下公心協力行  
之文正家藏一本一以與公今尚存也公在相  
舉荅詔文字與孫賁賁謂臣不密則失身莫且  
當孫順公曰事至此忠臣義士亦不顧若顧之  
言不可出口矣公謂小人不可求遠也三家村  
中亦有一家當求其處之之理知其為小人處  
之更不可校如校之則自小矣人有非毀但常

及已是不是已是則是在我而非在彼烏足計其如何公言始學行已當如金玉不受微塵之汚方是及其成德有所受亦有所不害者不然無容矣公嘗謂忠義之心人皆有之惟其執之不固勉之不力是以不及於古人潞公在西府人有以魏公進退諷潞公者潞公曰彥博豈可以望韓公韓公地位別彥博則有些齷齪材蒙朝廷擢備兩府耳人頗與潞公自知之明歐公少許人平日惟服韓公嘗因事發嘆曰象百歐脩不足望韓公公謂歐與曾同在兩府歐性素偏曾則離齷齪每議事至厲聲相攻不可解公一切



不問俟其氣定徐一言可否之二公皆服公謂  
大凡使人為善須就其性上做若中所無強之  
終不能從公判大名府一日倅車出按屬縣其  
女與簽判子踰牆私通倅妻親送至府廷公廼  
為之掌判使成婚對以掩前過仍以五百十助  
嫁公判京兆日得姪孫書云田產多為隣近侵  
占不欲經官陳理魏公止於書尾題詩一絕云  
他人侵我且從伊子細思量未有時試上含光  
殿基者秋風秋草正離離其後子孫蕃衍歷華  
要者不可勝數以其寬大之德致然也公判相  
州回祀宣尼省南有俞兒入室挺刀曰不能自

濟求濟於公公曰几上器具可直百千盡以與  
汝偷兒曰願得公晉以獻西人公即引頸偷兒  
稽顙曰以公德量過人故來相試几上之物已  
荷公賜願無泄也公曰諾終不以告人其後為  
盜者以他事坐罪當死於市中備言其事曰慮  
吾死後惜公之遺德不傳於世也公判大名府  
日有案吏請假娶妻繼有訟其不法及參假送  
獄勘正將引斷乃令封起公案及半年後一日  
令取前案送簽廳行遣二悴乃曰公曰此人自  
封案後頗謹愿不為非法乞恕罪如何公乃問  
二悴曰二公知某封案之意乎曰不知公乃云

此人緣請假娶妻繼而至訟當時若便斷遣必傷三家人情此人與父母必咎其妻而妻之父母亦不悅所以封起案卷今已半年矣無可疑者請一面行之公之臨政雖輕刑亦必致慮其後子孫蕃衍充滿要途皆公處心仁恕而致然也